

Bunreacht Samhla do Chuideachta faoi Theorainn Ráthaíochta

Ní sholáthraítear an bunreacht samhla seo ach ar mhaithe le cuspóirí eiseamláire. Ní bheidh gach foráil den bhunreacht seo oiriúnach do gach carthanas. Beidh ar gach carthanas bunreacht a ullmhú a chuireann san áireamh riachtanais agus cúinsí féin ar leith an charthanais. Sa chás gur gá, ba cheart duit do chomhairle dlí féin a fháil.

ACHT NA gCUIDEACHTAÍ, 2014

CUIDEACHTA FAOI THEORAINN RÁTHAÍOCHTA NACH BHFUIL SCAIRCHAIPITEAL AICI

BUNREACTH

-de chuid-

[*AINM NA CUIDEACHTA*]

MEABHRÁN COMHLACHAIS

1. **Ainm**

Is é ainm na Cuideachta [*AINM NA CUIDEACHTA*], cuideachta faoi theorainn ráthaíochta.

2. **Saghas na cuideachta**

Cuideachta atá inti atá faoi theorainn ráthaíochta, atá cláraithe faoi Chuid 18 d'Acht na gCuideachtaí, 2014.

3. **Príomhchuspóir**

Is é an príomhchuspóir dá mbunaíodh an Chuideachta (an “Príomhchuspóir”) [*príomhchuspóir nó príomhchuspóirí le hiontráil anseo*].

4. **Fochuspóirí**

Mar chuspóirí atá teagmhasach agus coimhdeach le baint amach an Phríomhchuspóra, beidh na fochuspóirí a leanas ag an gCuideachta:

[*iontráil fochuspóirí anseo*]

5. **Cumhachtaí**

Beidh na cumhachtaí a leanas ag an gCuideachta, anuas ar na cumhachtaí a bhronn an dlí uirthi, nach bhfuil ach ina gcumhachtaí coimhdeacha agus ina bhfochumhachtaí leis an bPríomhchuspóir agus ní féidir ach na cumhachtaí siúd a fheidhmiú agus an Príomhchuspóir á chur chun cinn. Tá aon ioncam a ghin feidhmiú na gcumhachtaí seo le cur i bhfeidhm ar chur chun cinn an Phríomhchuspóra:

- 5.1 Chun aon tabhartas maoinne d'aon chineál agus aon réadtiomnú, leagáid nó blianacht, suibscríbhinn, bronnantas, ranníocaíocht nó ciste a iarraidh agus a sholáthar agus a ghlacadh agus a fháil, ina measc trí mheán párolla a thabhairt nó trí shocruithe comhchosúla eile, agus lena n-áirítear (ach gan teorainn a leagan ar ghinearáltacht an mhéid thuas), crannchuir a chur ar bun i gcomhréir leis an dlí ar mhaithe leis an bPríomhchuspóir a chur chun cinn, agus an caipiteal, anuas ar ioncam ó aon leagáid, tabhartas nó ciste den saghas sin a chur i bhfeidhm ar an gcuspóir sin.
- 5.2 Aon iontaobhais charthanúla a ghabháil de lámh, a ghlacadh, a fhorghníomhú agus a riar, gan luach saothair.
- 5.3 Aon chomhlachas nó institiúid, iontaobhas nó ciste carthanúil a bhunú agus tacú leo nó cabhrú leo ina mbunú, agus chun airgead a shuibscríobh nó a ráthú d'aon chuspóir carthanúil a mheasfaidh an Chuideachta a rinneadh a ríomh chun a Príomhchuspóir a chur chun cinn.
- 5.4 Ranníocaíochtaí, tabhartais nó tiomnachaí deonacha nó airgead a bhailiú agus a fháil atá dírithe ar na cuspóirí thuasluaite.
- 5.5 Iarratas a dhéanamh thar ceann na Cuideachta ar aon údarás, bíodh údarás rialtais, áitiúil, daonchairdiúil nó eile i gceist leis, ar chistiú airgeadais d'aon sórt.
- 5.6 Aon Acht den Oireachtas nó reachtaíocht eile a bhaineann go díreach le cur chun cinn an Phríomhchuspóra a chur i bhfeidhm, a achainí nó a chur chun cinn.
- 5.7 Faoi réir chlásal 6, chun an fhoireann sin a fhostú, agus ar na téarmaí siúd, atá riachtanach nó inmhianaithe ar mhaithe leis an bPríomhchuspóir a chur chun cinn go cuí.
- 5.8 Chun pinsin, aiscí, liúntais nó cúnamh carthanúil a dheonú d'aon duine a d'fhéadfadh a sheirbheáil leis an gCuideachta mar fhostaí, nó do mhná céile, fir chéile, leanaí nó cleithiúnaithe eile an duine sin a fhad agus nach sáróidh na pinsin, aiscí, liúntais nó an cúnamh carthanúil sin é sin dá bhforáiltear i scéim pinsin atá cumhdaithe ag Cuid 30 den Acht Comhdhlúite Cánacha, 1997 agus a fhad gur oibrigh an Chuideachta an scéim pinsin sin agus go raibh tairbhí na bpinsean, na n-aisc, na liúntas nó an chúnamh charthanúil, nó a gcéile nó a dtuismitheoir, ina c(h)omhalta den scéim pinsin fad a bhí sé/sí fostaithe ag an gCuideachta; agus chun íocaíochtaí a dhéanamh i dtreo árachais agus chun cistí coigiltis agus sochair a fhoirmiú agus cur leo ar mhaithe le haon duine atá fostaithe ag an gCuideachta agus chun airgead a shuibscríobh nó a ráthú do chuspóirí carthanúla.
- 5.9 Aon mhaoin phearsanta nó réadach, paitinní, cóipchearta, ceadúnais, cearta agus pribhléidí nó aon eastát nó leas, dá laghad, agus aon chearta, pribhléidí agus éasúintí ar nó maidir le haon mhaoin a cheannach, a ghlacadh ar léas nó mar mhalairt, ar fruilíú nó a fháil ar bhealach eile a d'fhéadfaí a mheas atá riachtanach ar mhaithe le cuspóirí na Cuideachta agus chun aon talamh a fuair an Chuideachta nó a bhfuil leas aici inti a fhorbairt agus a úsáid nó brabús a

bhaint astu agus, go háirithe, tríd an gcéanna a leagan amach agus a ullmhú ar mhaithe le foirgnimh agus áiseanna a thógáil, a athrú, a tharraingt anuas, a mhaisiú, a chothabháil, a fheistiú suas agus trí chur, pábháil, draenáil, feirmeoireacht, saothrú, ligean nó léasanna foirgnimh nó trí chomhaontú tógála agus trí airgead a réamhíoc le agus iontráil isteach i gconarthaí agus socruithe de gach cineál le tógálaithe, tionóntaí agus le daoine eile.

- 5.10 Aon chuid de mhaoin na Cuideachta, nó maoin uile na Cuideachta a fháil, a shealbhú, a dhíol, a bhainistiú, a ligean ar léas, a mhorgáistiú, a mhalartú nó a dhiúscairt d'fhonn Príomhchuspóir na Cuideachta a chur chun cinn, a chosaint nó a spreagadh agus chun infheistíochtaí a éagsúlú.
- 5.11 Comhoibriú le haon chumann nó institiúid eile i dtabhairt faoi aon infheistíochtaí a údaraítear leis seo chun an Príomhchuspóir a chur chun cinn.
- 5.12 Airgead a fháil ar iasacht agus a thiomsú ar an mbealach sin a d'fhéadfaí a mheas gurb ionann é agus caoithiúil, agus chun bintiúir, stoc bintiúir agus urrúis eile a eisiúint, agus ar mhaithe le haon fhiachas nó oibleagáid eile den Chuideachta a chur faoi urrús chun maoin uile nó aon chuid de mhaoin reatha nó amach anseo na Cuideachta a mhorgáistiú nó a mhuirearú agus a mhorgáistiú nó a mhuirearú go comhthaobhach nó de bhreis ar aon urrúis de chuid na Cuideachta trí ghníomhas iontaobhais nó trí dhearbhu eile.
- 5.13 Airgead agus maoin na Cuideachta nach dteastaíonn láithreach bonn a infheistiú agus déileáil leo ar an mbealach sin is éifeachtaí a sholáthróidh cistí chun na cuspóirí thuasluaite a chothú agus a chur chun cinn agus áireofar leis an gcumhacht seo an chumhacht chun aon infheistíochtaí a athrú a rinneadh fúthu, ó thráth go tráth.
- 5.14 Aon airgead de chuid na Cuideachta a infheistiú ar na bealaí siúd a mheasann na Stiúrthóirí is inmhianaithe nach dteastaíonn láithreach bonn lena úsáid maidir lena Príomhchuspóir agus chun aon airgead den sórt sin a thaisceadh le baincéirí agus le daoine eile; faoi réir, mar sin féin, go ndéantar infheistíochtaí faoi na coinníollacha siúd (más ann dóibh) agus an toiliú sin (más ann dó) a d'fhéadfaí a cheangal nó a fhorchur sa dlí agus faoi réir, chomh maith leis sin, an mhéid a fhoráiltear anseo thíos; tá cead roimh ré le fáil ó na Coimisinéirí Ioncaim sa chás go mbeartaíonn an Chuideachta chun cistí a charnadh i gcaitheamh tréimhse os cionn dhá bhliain d'aon chuspóirí.
- 5.15 Tabhairt faoi na oibleagáidí agus aisíocaíocht nó íocaíocht na bpríomhshuimeanna agus ús aon duine, ghnóthais nó cuideachta nó díbhinní nó ús aon urrús, ina measc (gan dochar a dhéanamh do chineál ginearálta an mhéid thuas) aon chuideachta arb í cuideachta shealbhaíochta na Cuideachta nó fochuideachta nó cuideachta ghaolmhar de chuid na Cuideachta, a ráthú, tacú leo nó a chur faoi urrús, cé acu trí chúnant pearsanta nó tríd an gceangaltas, an mhaoin agus na sócmhainní (reatha agus amach anseo) go léir nó aon chuid díobh de chuid na Cuideachta a mhorgáistiú nó a mhuirearú.
- 5.16 Billí malartaithe, nótaí gealltanais, billí luchta, barántais, bintiúir agus ionstraimí inaistrithe nó soshannta eile a dhréachtú, a ghlacadh, a dhéanamh, a fhormhuiniú, a lascainiú, a fhorghníomhú, a eisiúint agus a aistriú.

- 5.17 Chun maoin na Cuideachta a árachú i gcoinne aon riosca intuartha ar a luach iomlán agus polasaithe eile árachais a ghlacadh chun an Chuideachta a chosaint, nuair a bhíonn gá leo.
- 5.18 Aon duine de na Stiúrthóirí, nó na Stiúrthóirí go léir a árachú i gcoinne dliteanas pearsanta a thabhaítear maidir le haon ghníomh nó easnamh arb ionann é agus sárú ar iontaobhas nó sárú ar dhualgas nó a líomhnaítear gurb ionann é agus sárú ar iontaobhas nó sárú ar dhualgas, a fhad agus a ghníomhaigh sé nó sí le dea-intinn agus i bhfeidhmiú a fheidhmeanna nó a feidhmeanna mar **iontaobhaí carthanais/chomhalta feidhmiúcháin** (faoi mara shainmhínítear san Acht Carthanas, 2009).
- 5.19 Iarratas a dhéanamh ar aon phaitinní, brevet d'invention, ceadúnais, lamháltais agus a leithéid agus iad a cheannach nó a fháil ar bhealach eile a bhronnann aon chearta eisiacha nó neamheisiacha nó teoranta ar úsáid nó aon fhaisnéis rúnda nó eile maidir le haon aireagán ar dhealraitheach go bhféadfaí é a úsáid d'aon cheann de chuspóirí na Cuideachta nó chun aon cheann díobh siúd a fháil, a bhféadfadh go bhfuil an dealramh air go ndearnadh iad a ríomh go díreach nó go hindíreach chun dul chun sochair na Cuideachta, agus chun ceadúnais a úsáid, a fheidhmiú, a fhorbairt nó a dheonú maidir le maoin, cearta nó faisnéis a fuarthas ar an mbealach sin nó chun úsáid nó brabús a bhaint as an maoin, na cearta nó an fhaisnéis sin.
- 5.20 Glacadh leis an mbealach sin chun táirgí agus/nó seirbhísí na Cuideachta a chur in iúl is dealraitheach is caoithiúil agus go háirithe, trí fhógraíocht sna nuachtáin, trí chiorcláin, trí shaothair ealaíne nó trí leas a cheannach nó a thaispeáint, trí leabhair agus tréimhseacháin a fhoilsiú agus tríd an idirlíon agus trí dhuaiseanna, luaíochtaí agus tabhartais a dheonú.
- 5.21 Fóntais phoiblí a choimeád, a fheabhsú nó a sholáthar, ina measc áiseanna áineasa, cúram leanaí, sláinte poiblí, baile, leasa agus áiseanna óige, go ginearálta.
- 5.22 Iontráil in aon socrúithe le haon rialtais nó údaráis, bíodh siad ina rialtais nó údaráis uachtaracha, bhargasacha, áitiúla nó eile a bhféadfadh gur dhealraitheach go gcuirfidís an Príomhchuspóir chun cinn agus chun aon chearta, pribhléidí agus lamháltais a fháil ón rialtas nó údarás sin a fhéadfaidh an Chuideachta a mheas is inmhianaithe chun tabhairt faoi aon socrúithe, cearta, pribhléidí agus lamháltais den saghas sin agus iad a fheidhmiú agus a chomhlíonadh.
- 5.23 Iontráil i gcomhpháirtíocht nó in aon socrú chun le haghaidh brabúis a roinnt, leas a aontú, comhoibriú, comhfhiontair, lamháltas cómhálartach nó ar bhealach eile le haon duine, cuideachta, cumann, iontaobhas nó comhpháirtíocht eile a bhfuil a gcuspóirí go hiomlán carthanúil, a dtugann a gcuspóirí faoi, nó a bhfuil a gcuspóirí ar tí tabhairt faoi, aon ghnó nó idirbheart ar féidir tabhairt faoi d'fhonn dul chun sochair na Cuideachta go díreach nó go hindíreach agus a chuireann toirmeasc ar dháileadh ioncaim agus sócmhainní dá mhéid, dá laghad, de bhuan Chlásal 6 anseo istigh agus chun conarthaí aon duine, cuideachta, cumann, iontaobhas nó comhpháirtíocht eile sin a rathú, agus chun cabhrú, ar bhealach eile, le haon duine, cuideachta, cumann,

iontaobhas nó comhpháirtíocht eile sin, agus chun scaireanna, stoc, bintiúir, nó stoc bintiúir agus urrúis aon duine, cuideachta, cumainn, iontaobhais nó comhpháirtíochta sin a tháthcheangal nó a fháil ar bhealach eile, agus chun an céanna a dhíol, a shealbhú, a atheisiúint le ráthaíocht nó gan ráthaíocht nó chun déileáil leis an gcéanna ar bhealach eile.

- 5.24 Clárú nó corprú na Cuideachta a thabhairt chun críche i ndlíthe nó faoi dhlíthe aon áite lasmuigh d'Éirinn.
- 5.25 Gach costas de chuid agus gach costas teagmhasach a bhaineann le corprú agus bunú na Cuideachta a íoc.
- 5.26 Tabhairt faoi, ar bhonn aonair nó i gcomhar le daoine eile, aon trádáil gnó a bhféadfadh an Chuideachta tabhairt fúithi ar bhealach buntáisteach, i dtuairim na Stiúrthóirí, i dtaca le nó anuas ar aon cheann de ghnóthaí nó de ghnó ginearálta na Cuideachta i dtabhairt faoin bPríomhchuspóir.
- 5.27 Aon chistí, comhlachais nó institiúidí a bhunú, a fhóirdheonú agus a chuidiú a dheimhnítear a chuireann an Príomhchuspóir chun cinn nó a thugann cúnamh dó.
- 5.28 Ceangail a bhunú agus a choimeád le heagraíochtaí idirnáisiúnta agus náisiúnta a bhfuil a mhacasamhail de chuspóirí acu.
- 5.29 Gach rud dlíthiúil eile sin a dhéanamh a fhéadfaidh an Chuideachta a mheas atá teagmhasach le agus a chuidíonn leis an bPríomhchuspóir roimhe seo.
- 5.30 Chun gach ceann de na rudaí agus na ceisteanna a thuasluaitear, nó aon chinn díobh, a dhéanamh in aon áit ar domhan agus mar phríomhoifigigh, gníomhairí, conraitheoirí, iontaobhaithe nó mar dhaoine eile agus trí iontaobhaithe, gníomhairí nó daoine eile agus cé acu ar bhonn aonair nó i gcomhar le daoine eile.

A FHAD:

- (a) i gcás go nglacfaidh an Chuideachta aon mhaoin i seilbh nó go sealbhaíonn sí aon mhaoin a d'fhéadfadh bheith faoi réir aon iontaobhas, ní dhéileálfadh an Chuideachta le nó ní infheistoidh an Chuideachta an céanna ach ar an mbealach sin a cheadaítear sa dlí agus aird ar na hiontaobhais siúd;
- (b) ní mheasfar go gcuirtear san áireamh in aon rud a chuimsítear anseo thuas aon chuspóirí nach bhfuil carthanúil i gcomhréir leis an dlí sna cuspóirí dá mbunaíodh an Chuideachta.

6. Ioncam agus Maoin

- 6.1 Ní chuirfear ioncam agus maoin na Cuideachta i bhfeidhm ach amháin i dtreo chur i bhfeidhm an Phríomhchuspóra/na bPríomhchuspóirí, faoi mar a leagtar amach iad sa Bhunreacht seo. Ní dhéanfar aon sciar d'ioncam agus de mhaoin na Cuideachta a íoc nó a aistriú go díreach nó go hindíreach trí dhíbhinn, bónas nó ar bhealach eile cibé caoi trí bhrabús do chomhaltaí na Cuideachta.
- 6.2 Ní cheapfar aon Stiúrthóir le haon oifig na Cuideachta lena n-íoctar tuarastal nó táillí, nó ní bhfaighidh aon Stiúrthóir aon luach saothair nó sochar eile in airgead nó i luach airgid ón gCuideachta. Ní chuirfidh aon ní cosc ar an gCuideachta, áfach, na níthe a leanas a íoc le hintinn mhaith:
- (a) luach saothair réasúnta agus cuí le haon chomhalta nó seirbhíseach den Chuideachta (nach Stiúrthóir é/í) as aon seirbhísí a soláthraíodh don Chuideachta;
 - (b) ús ar ráta nach sáraíonn 1% os cionn Ráta Táirgthe Idirbhainc an Euro (Euribor) sa bhliain ar airgead a thug Stiúrthóirí nó comhaltaí eile den Chuideachta ar iasacht leis an gCuideachta;
 - (c) cíós réasúnta agus cuí ar an áitreabh a lig aon chomhalta den Chuideachta ar fhorléas agus ar léas (aon Stiúrthóir san áireamh) leis an gCuideachta;
 - (d) costais réasúnta agus chuí as póca a thabhaíonn aon Stiúrthóir maidir lena bhfreastal ar aon cheist a imríonn tionchar ar an gCuideachta;
 - (e) táillí, luach saothair nó sochar eile in airgead nó i luach airgid le haon chuideachta a bhféadfadh Stiúrthóir bheith ina c(h)omhalta dí nach sealbhaíonn breis agus an céadú cuid de chaipiteal eisithe na cuideachta sin.
 - (f) Ní chuirfidh aon ní cosc ar an gCuideachta aon íocaíocht a dhéanamh le duine de bhun comhaontú inar iontráladh i gcomhlíonadh alt 89 den Acht Carthanas, 2009 (i gcaitheamh an trátha a bhíonn sé leasaithe, sínte nó ionadaithe).

7. Breisiúcháin, athruithe nó leasuithe

Ní mór don Chuideachta a chinntiú go bhfuil cóip ag an Rialálaí Carthanas dá Bunreacht is déanaí. Má bheartaítear leasú a dhéanamh ar Bhunreacht na Cuideachta óna dteastaíonn faomhadh roimh ré a fháil ón Rialálaí Carthanas, ní mór fógra roimh ré a thabhairt, i scríbhinn, faoi na hathruithe beartaithe don Rialálaí Carthanas chun iad a fhaomhadh, agus ní chuirfear an leasú i bhfeidhm go dtí go bhfaightear an faomhadh sin.

8. **Foirceannadh**

Más ann d'aon mhaoín, dá laghad, i ndiaidh gach dliteanas agus fiachas a shásamh, ní íocfar í nó ní dhéanfar í a dháileadh i measc chomhaltaí na Cuideachta, ar fhoirceannadh nó ar dhíscáoileadh na Cuideachta. Ina ionad sin, déanfar an mhaoín sin a thabhairt nó a aistriú chuig institiúid charthanúil nó institiúidí carthanúla eile a bhfuil príomhchuspóirí acu atá macasamhail phríomhchuspóirí na Cuideachta. Cuirfidh an institiúid nó na hinstitiúidí, a bhfuil an mhaoín le tabhairt dóibh nó le haistriú chucu, cosc ar dháileadh a n-ioncaim agus a maoinne i measc a gcomhaltaí dá mhéid sin, ar a laghad, a ghearrann an Chuideachta faoi nó de bhua Chlásal 6 anseo istigh. Roghnóidh comhaltaí na Cuideachta an institiúid nó na hinstitiúidí ábhartha ag nó roimh thráth an díscáoilte, agus mura féidir agus dá mhéid nach féidir éifeacht a thabhairt do na forálacha siúd, tabharfar nó aistreofar an mhaoín do chuspóir carthanúil áirithe nó chuig cuspóir carthanúil áirithe i ndiaidh chomhaontú an Rialálaí Carthanas a fháil. Ullmhófar agus seolfar ar aghaidh cuntais deiridh, lena n-áireofar mír a shainaithníonn agus a dhéanann luacháil ar aon sócmhainní a aistrítear mar aon leis na sonraí faoi na faighteoirí agus téarmaí an aistrithe.

9. **Dlitéanas Teoranta**

Tá dlitéanas na gcomhaltaí teoranta.

10. **Gealladh chun Ranníocaíocht a dhéanamh**

Geallann gach comhalta den Chuideachta chun ranníoc le sócmhainní na Cuideachta, má dhéantar an Chuideachta a fhoirceannadh fad a bhíonn sé nó sí ina c(h)omhalta nó má dhéantar an Chuideachta a fhoirceannadh laistigh de bhliain amháin i ndiaidh an dáta nach comhalta é/í den Chuideachta a thuilleadh,

- (a) chun fiachais agus dliteanais na Cuideachta a íoc a conraíodh sula gcuirtear deireadh leis nó léi bheith mar chomhalta a thuilleadh, agus chun costais, muirir agus speansais a bhaineann le foirceannadh a íoc; agus
- (b) chun coigeartú a dhéanamh ar chearta na ranníocóirí ina measc féin,

den tsuim sin a d'fhéadfadh bheith ag teastáil, nach sáraíonn €1, a íoc.

AIRTEAGAIL CHOMHLACHAIS

RÉAMHRÁITEACH

1. Sna hAirteagail seo, murach go bhfuil rud éigin san ábhar nó sa chomhthéacs nach bhfuil comhsheasmhach leis seo:

Ciallaíonn “**an tAcht**” Acht na gCuideachtaí, 2014.

Ciallaíonn “**an Chuideachta**” an Chuideachta a ainmnítear thuas.

Ciallaíonn “**na Stiúrthóir**” comhaltaí i dturas an ama de chuid bhord stiúrthóirí na Cuideachta agus forléireofar “Stiúrthóir” dá réir sin.

Ciallaíonn “**an Rúnaí**” aon duine a cheaptar chun tabhairt faoi dhualgais Rúnaí na Cuideachta.

Ciallaíonn “**an Séala**” Séala Coiteann na Cuideachta.

Forléireofar léiriú a thagraíonn do scríobh, mura dtagann an intinn chontrártha chun solais, amhail tagairt a áireamh do chlóg, liteagrafaíocht, grianghrafadóireacht agus aon mhodhanna eile a dhéanann ionadaíocht d’fhocail i bhfoirm infheicthe agus focail a atáirgeadh i bhfoirm infheicthe.

COMHALTAÍ

2. Ar mhaithe le cuspóirí clárúcháin, glactar leis gurb ionann líon comhaltaí na Cuideachta agus [*iontráil líon*] ach féadfaidh an Chuideachta, ó thráth go tráth, méadú comhaltaí a chlárú.
3. Is éard a bheidh i gcomhaltaí na Cuideachta (i) suibhscriobhaithe leis an Meabhrán Comhlachais agus (ii) na daoine eile siúd a cheadóidh na Stiúrthóirí ó thráth go tráth bheith sa ballraíocht agus a shíneoidh toiliú scríofa go ndéanfar comhalta díobh.

CEARTA COMHALTAÍ

4. Níl ballraíocht na Cuideachta inaistrithe agus cuirfear deireadh léi:-
 - (a) ar bhás nó ar fhéimheacht an chomhalta;
 - (b) má éiríonn an comhalta as trí fhógra i scríbhinn a sheirbheáil ar Stiúrthóirí na Cuideachta ag a hoifig chláráithe.

CRUINNITHE GINEARÁLTA

5. Cuirfidh an Chuideachta cruinniú ginearálta ar bun i ngach bliain féilire ag a gcruinniú bliantúil ginearálta ag an am agus ag an áit sin a chinnfidh na Stiúrthóirí

agus sonrúidh sí an cruinniú ar leith sin amhlaidh sna fógraí a dhéanann é a ghairm a fhad agus go gcuirfear gach cruinniú ginearálta bliantúil, seachas an chéad cheann, ar bun tráth nach faide ná cúig mhí dhéag i ndiaidh gur cuireadh an cruinniú ginearálta bliantúil deiridh ar bun roimhe sin agus a fhad agus go gcuireann an Chuideachta a céad chruinniú ginearálta bliantúil ar bun laistigh d'ocht mí dhéag i ndiaidh dháta an chorpraithe, ní gá don Chuideachta an cruinniú a chur ar bun i mbliain a corpraithe.

6. Tabharfar cruinnithe ginearálta urghnácha ar gach cruinniú, seachas cruinnithe ginearálta bliantúla.
7. Féadfaidh Stiúrthóirí, pé uair a mheasann siad is cuí, cruinniú ginearálta urghnách a thionól.
8. Mura bhfuil dóthain stiúrthóirí in ann gníomhú chun líon comhaltaí a chruthú, ag aon tráth, féadfaidh aon Stiúrthóir den Chuideachta nó aon chomhalta den Chuideachta cruinniú ginearálta urghnách a thionól ar an mbealach céanna a mhéid agus is féidir a fhéadfaidh na Stiúrthóirí cruinnithe a thionól.
9. Déanfaidh Stiúrthóirí na Cuideachta, ar fhoréileamh duine amháin nó níos mó de na comhaltaí a bhfuil 10%, ar a laghad, de chearta iomlána vótála na gcomhaltaí acu, nó i dteannta a chéile, ag dáta thaisceadh an fhoréilimh, a bhfuil an ceart acu chun vóta a chaitheamh ag cruinnithe ginearálta na Cuideachta, leanúint ar aghaidh láithreach bonn chun cruinniú ginearálta urghnách na Cuideachta a thionól.
10. Luafar san fhoréileamh cuspóirí an chruinnithe agus síneoidh na foréilitheoirí é agus déanfaidh siad é a thaisceadh ag oifig chláráithe na Cuideachta agus féadfaidh roinnt cáipéisí bheith i gceist leis ina mhacasamhail d'fhoirm a bhfuil gach ceann díobh sínithe ag duine amháin nó níos mó de na foréilitheoirí.
11. Mura leanann na Stiúrthóirí, laistigh de 21 lá i ndiaidh dháta thaiscthe an fhoréilimh, ar aghaidh láithreach bonn chun cruinniú a thionól atá le tionól laistigh de 2 mhí i ndiaidh an dáta sin (“dáta an fhoréilimh”), féadfaidh na foréilitheoirí, nó aon duine díobh a dhéanann ionadaíocht do bhreis agus 50% de na cearta iomlána vótála atá acu go léir, cruinniú a thionól iad féin, ach ní chuirfear aon chruinniú a thionóltar ar an mbealach sin ar siúl i ndiaidh go n-éagann 3 mhí i ndiaidh dháta an fhoréilimh.
12. Aisíocfaidh an chuideachta aon chostais réasúnta a thabhaíonn na foréilitheoirí i ngeall gur theip ar na stiúrthóirí chun cruinniú a thionól, mar is cuí, leis na foréilitheoirí agus coimeádfaidh an chuideachta aon suim a aisíoctar ar an mbealach sin as aon suimeanna atá dlite nó a bheidh dlite ón gCuideachta trí tháillí nó luach saothair eile maidir leis na seirbhísí a sholáthair siad do na Stiúrthóirí siúd ar theip orthu.
13. Chun críocha Airteagail 10 go 13, measfar nach ndearna na Stiúrthóirí, i gcás cruinniú ina bhfuil rún le beartú mar rún speisialta, cruinniú a thionól mar is ceart mura dtugann siad an fógra sin ina leith, faoi mar a cheanglaítear in Alt 181 den Acht.
14. Tionólfar cruinniú a thionóltar faoi Airteagal 10 nó 12 ar an mbealach céanna a mhéid is féidir a dhéanann stiúrthóirí cruinnithe a thionól.

15. Beidh cathaoirleach bhord na stiúrthóirí i gceannas mar chathaoirleach ag gach cruinniú ginearálta na Cuideachta, nó murab ann don chathaoirleach sin, nó mura bhfuil sé nó sí i láthair laistigh de 15 nóiméad i ndiaidh an ama a cheaptar chun an cruinniú a chur ar bun nó mura toiliúil dó nó di chun gníomhú, toghfaidh na stiúrthóirí atá i láthair duine dá líon chun cathaoirleacht a dhéanamh ar an gcruinniú.
16. Mura bhfuil aon stiúrthóir toiliúil chun gníomhú mar chathaoirleach nó mura bhfuil aon stiúrthóir i láthair ag aon chruinniú laistigh de 15 nóiméad i ndiaidh an ama a cheaptar chun an cruinniú a chur ar bun, féadfaidh na comhaltaí atá i láthair duine dá líon a roghnú chun cathaoirleacht a dhéanamh ar an gcruinniú.
17. Féadfaidh an cathaoirleach, le toiliú aon chruinnithe a bhfuil líon gnó i láthair ann agus déanfaidh an cathaoirleach, má ordaíonn an cruinniú amhlaidh, an cruinniú a chur ar athló ó thráth go tráth agus ó áit go háit. Ní dhéanfar aon ghnó, áfach, ag aon chruinniú a cuireadh ar athló, seachas an gnó nár tugadh chun críche ag an gcruinniú ónar thit an t-athló amach. Nuair a chuirtear cruinniú ar athló ar feadh 30 lá nó níos faide, tabharfar fógra maidir leis an gcruinniú a cuireadh ar athló amhail i gcás cruinniú bunúil ach, faoi réir sin, ní bheidh sé riachtanach aon fhógra maidir le hathló nó leis an ngnó a dhéanfar ag cruinniú a cuireadh ar athló a thabhairt.
18. Mura n-éilítear vótáil i gcomhréir le hAirteagal 38, ag aon chruinniú ginearálta:
 - (a) déanfar cinneadh ar rún i dtaca le vótáil an chruinnithe trí lámha a thaispeáint; agus
 - (b) is ionann a bheidh dearbhú ag an gcathaoirleach gur glacadh le rún nó gur glacadh le rún d'aon ghuth, trí lámha a thaispeáint, nó trí thromlach ar leith, nó nár éirigh leis, agus iontráil chuige sin sa leabhar ina gcuimsítear miontuairiscí ar imeachtaí na Cuideachta agus fianaise chríochnúil i leith na caoi, gan chruthúnas i leith líon nó chomhréir na vótaí a chuirtear i dtaifead i bhfabhar nó i gcoinne an rúin sin.
19. Sa chás gurb ann do chomhionannas vótaí, cé acu trí lámha a thaispeáint nó trí vótaí a chaitheamh, beidh cathaoirleach an chruinnithe ina n-éilítear lámha a thaispeáint nó ina gcaitear vótaí, i dteideal an dara vóta nó vóta réitigh a chaitheamh.
20. Faoi réir alt 193 den Acht (arna mhionathrú ag alt 1208 den Acht), beidh rún i scríbhinn atá sínithe ag gach duine de chomhaltaí na Cuideachta atá i dteideal, i dturas an ama, chun freastal agus vóta a chaitheamh ar an rún sin ag cruinniú ginearálta (nó ar comhlachtaí iad atá corpraithe ag a n-ionadaithe a ceapadh go cuí) chomh bailí agus chomh héifeachtach céanna ar gach cuspóir amhail dá rithfí an rún ag cruinniú ginearálta na Cuideachta a tionóladh go cuí agus a cuireadh ar bun go cuí agus má dhéantar cur síos air mar rún speisialta, measfar gurb ionann é agus rún speisialta laistigh de bhrí an Achta. D'fhéadfadh roinnt cáipéisí ina macasamhail d'fhoirm, a bhfuil gach ceann díobh sínithe ag comhalta amháin nó níos mó a bheith i gceist le haon rún i scríbhinn den sórt sin. Measfar gur ritheadh é ag cruinniú a bhí ar siúl ar an dáta a shínigh an comhalta deiridh a raibh sé le síniú aige/aici, agus, sa chás go luaitear dáta sa rún amhail bheith mar an dáta a shínigh aon chomhalta é, is ionann a bheidh an ráiteas seo agus fianaise prima facie gur shínigh sé/sí é ar an dáta sin.

FÓGRA MAIDIR LE CRUINNITHE GINEARÁLTA

21. Déanfar cruinniú na Cuideachta, seachas cruinniú a cuireadh ar athló, a ghairm sna cásanna a leanas:
 - (a) i gcás cruinniú ginearálta bliantúil nó cruinniú ginearálta urghnách chun rún speisialta a rith, i ndiaidh fógra 21 lá, ar a laghad, a thabhairt;
 - (b) i gcás aon chruinnithe ghinearálta urghnách eile, i ndiaidh fógra 7 lá, ar a laghad, a thabhairt.
22. Measfar go ndearnadh cruinniú na Cuideachta, in ainneoin go ndéantar é a ghairm i ndiaidh fógra níos giorra a thabhairt ná mar a shonraítear in Airteagal 22, a ghairm go cuí má chomhaontaítear amhlaidh:
 - (a) ag gach duine de na comhaltaí atá i dteideal chun freastal ar an gcruinniú agus chun vóta a chaitheamh ar an gcruinniú; agus
 - (b) mura bhfuil aon iniúchóirí reachtúla na Cuideachta ceaptha go fóill i ngeall go raibh fáil ag an gCuideachta ar an díolúine iniúchta, i measc iniúchóirí reachtúla na Cuideachta.
23. Sa chás go dtugtar fógra maidir le cruinniú tríd an bhfógra a sheoladh sa ghnáthphost réamhíoctha chuig seoladh cláraithe comhalta, measfar, ar an ábhar sin, gur tugadh an fógra ar éag 24 uair an chloig i ndiaidh an fógra a chur sa phost, ar mhaithe le haon saincheist maidir le cé acu ar tugadh nó nár tugadh an tréimhse cheart fógra don chruinniú sin.
24. Nuair a dheimhnítear cé acu ar tugadh nó nár tugadh i bhfógra maidir le cruinniú an tréimhse cheart fógra, ní chuirfear an lá a sheirbheáiltear an fógra ná lá an chruinnithe dá dtugadh an fógra, san áireamh.
25. Sonrófar san fhógra i leith cruinniú an méid a leanas:
 - (a) áit, dáta agus am an chruinnithe;
 - (b) cineál ginearálta an ghnó atá le déanamh ag an gcruinniú;
 - (c) i gcás rún speisialta a bheartaítear, téacs nó substaint an rúin speisialta sin a bheartaítear; agus
 - (d) ráiteas ina bhfuil an tsuntasacht réasúnta a luann:
 - (i) go bhfuil comhalta atá i dteideal freastal agus vóta a chaitheamh i dteideal seachvótálaí a cheapadh tríd an bhfoirm a leagtar amach in Alt 184 den Acht a úsáid nó, sa chás go gceadaítear sin, seachvótálaí amháin nó níos mó, chun freastal, labhairt agus vótáil ina (h)ionad;
 - (ii) nach gá gur comhalta seachvótálaí;

- (iii) is amhlaidh atá an t-am nach mór an seachvóta a bheith faighte faoi ag oifig chláraithe na Cuideachta nó ag áit éigin eile laistigh den Stát agus an t-am sin atá sonraithe sa ráiteas don chuspóir sin.

26. Ní dhéanfar na himeachtaí ag an gcrúinniú a neamhbhailiú i ngeall ar neamhghníomh taismeach chun fógra a thabhairt do, nó neamhfháil fógra maidir le cruinniú, ag aon duine atá i dteideal fógra a fháil.

VÓTAÍ COMHALTAÍ

27. Sa chás go bhfuil cinneadh á dhéanamh ar cheist (cé acu trí lámha a thaispeáint nó trí vótáil), beidh vóta amháin ag gach comhalta i bpearsan atá i láthair agus ag gach seachvótálaí, ach ní bheidh breis agus vóta amháin ag aon chomhalta aonair.
28. Ní thabharfar aon chur in aghaidh chun solais maidir le cáiliú aon vótálaí seachas ag an gcrúinniú nó ag an gcrúinniú a cuireadh ar athló ina dtugtar an vóta ar cuireadh ina aghaidh nó ina ndearnadh é a thairiscint, agus beidh gach vóta nach ndícheadaítear ag an gcrúinniú sin bailí ar gach cuspóir. Déanfar aon chur in aghaidh a rinneadh i dtráth cuí a chur faoi bhráid chathaoirleach an chruinnithe, a mbeidh a c(h)inneadh críochnaitheach agus conclúideach.
29. Is féidir vótaí a chaitheamh i bpearsan nó trí sheachvóta. Sa chás gurb ann do chomhionannas vótaí, cé acu trí lámha a thaispeáint nó trí vótaí a chaitheamh, beidh cathaoirleach an chruinnithe ina n-éilítear lámha a thaispeáint nó ina gcaitear vótaí, i dteideal an dara vóta nó vóta réitigh a chaitheamh.

SEACHVÓTÁLAITHE

30. Beidh comhalta den Chuideachta atá i dteideal freastal ar chruinniú na Cuideachta agus vóta a chaitheamh ann, i dteideal duine eile a cheapadh (bíodh comhalta i gceist leis/léi nó a mhalairt) mar a s(h)eachvótálaí agus vóta a chaitheamh ina (h)ionad. Beidh an ceart céanna ag seachvótálaí a cheaptar ar an mbealach sin a bhíonn ag an gcomhalta chun labhairt ag an gcrúinniú agus chun vóta a chaitheamh trí lámha a thaispeáint agus trí vótáil.
31. Beidh an ionstraim a cheapann seachvótálaí (“**Ionstraim an tSeachvótálaí**”) i scríbhinn –
- (a) faoi lámh an cheapaí nó a (h)aturnae atá údaraithe go cuí i scríbhinn; nó
- (b) más comhlacht corpraithe an cheapaí, cé acu faoi shéala an chomhlachta chorpraithe nó faoi lámh oifigigh nó aturnae dá chuid atá údaraithe go cuí i scríbhinn.
32. Taiscfear Ionstraim an tSeachvótálaí agus an chumhacht aturnae nó an t-údarás eile, más ann dó, faoinar síníodh é nó cóip atá deimhnithe ag nótaire den chumhacht nó den údarás sin, ag oifig chláraithe na Cuideachta nó ag an áit eile sin laistigh den Stát a shonraítear chun na críche sin san fhógra a thionólaíonn an cruinniú, agus taiscfear é

tráth nach déanaí ná an t-am a leanas:-

- (a) 48 uair an chloig roimh an am a chuirfear an cruinniú nó an cruinniú a cuireadh ar athló ar bun ag a mbeartaíonn an duine a ainmnítear san ionstraim vóta a chaitheamh; nó
 - (b) i gcás vótála, 48 uair an chloig roimh an am a cheapar chun an vótáil a dhéanamh.
33. Féadtar taisceadh Ionstraim an tSeachvótálaí a chur i gcrích, seachas trína chur i gcrích tríd an ionstraim a sheoladh nó a sheachadadh, tríd an ionstraim a chur in iúl don Chuideachta ar bhealach leictreonach (faoi mar a shainítear in alt 2 den Acht) agus baineann an tAirteagal seo, ar an gcuma chéanna, le haon rud eile a thaisceadh dá dtagraítear san Airteagal réamhluaite.
34. Beidh ionstraim a cheapann seachvótálaí san fhoirm a leanas nó i bhfoirm atá chosúla leis a cheadaíonn na cúinsí –

[*Ainm na Cuideachta*] (“**an Chuideachta**”)

Ceapann [*Ainm an Chomhalta*] (“**an Comhalta**”) a chónaíonn ag [*Seoladh an Chomhalta*], ar comhaltaí é/í den Chuideachta, leis seo, [*ainm agus seoladh an tseachvótálaí*] nó ina éagmais nó ina héagmais [*ainm agus seoladh an tseachvótálaí eile*] mar sheachvótálaí an Chomhalta atá le freastal, le labhairt agus le vóta a chaitheamh don Chomhalta thar ceann an Chomhalta ag cruinniú ginearálta (bliantúil nó urghnách, de réir mar a bheidh) na Cuideachta atá le bheith ar siúl an [*dáta an chruinnithe*] agus ag aon athló den chruinniú.

Is é an seachvótálaí a bhfuil vóta le caitheamh aige/aici:-

Treoracha maidir le vótáil don seachvótálaí

(Tá an rogha le marcáil le “X”)

Líon nó cur síos ar an rún:	I bhFabhar	Staadadh	I gCoinne
1.			
2.			
3.			

Mura n-ordaítear a mhalairt, caithfidh an seachvótálaí vóta de réir mar a mheasann sé nó sí is cuí.

Síniú an Chomhalta.....

Dar dáta [*dáta*]

VÓTA A CHAITHEAMH I VÓTÁIL

35. Ag cruinniú, féadtar vótáil a éileamh maidir le ceist (cé acu roimh nó ar dhearbhú thoradh na taispeána lámh a bhaineann léi).
36. Is féidir leo seo a leanas éileamh ar vótáil a dhéanamh:
- (a) cathaoirleach an chruinnithe;
 - (b) ar a laghad triúr comhaltaí atá i láthair i bpearsan nó seachvótálaí;
 - (c) aon chomhalta nó comhaltaí i bpearsan nó trí sheachvótálaí agus a bhfuil líon nach lú ná 10% acu de chearta iomlána vótála chomhaltaí uile na Cuideachta atá i gceist a bhfuil an ceart chun vótála acu ag an gcruinniú.
37. Féadfaidh an duine nó na daoine a rinne an t-éileamh éileamh ar an vótáil sin a aistarraingt. Faoi réir Airteagal 39, má éilítear vótáil, tabharfar fúithi ar an mbealach sin a ordaíonn cathaoirleach an chruinnithe, agus measfar gurb ionann toradh na vótála agus an rún, maidir leis an gceist a bhíonn faoi chaibidil, de chuid an chruinnithe inar éilíodh an vótáil.
38. Tabharfar faoi vótáil a éilíodh maidir le cathaoirleach a thoghadh nó maidir le ceist athló láithreach bonn.
39. Tabharfar faoi vótáil ar aon cheist eile ag an tráth sin a ordaíonn cathaoirleach an chruinnithe, agus féadtar leanúint ar aghaidh le haon ghnó eile seachas leis an gnó sin ar éilíodh vótáil ina thaobh, ar feitheamh an vótáil a dhéanamh.
40. Measfar, chomh maith leis sin, go ndéanfaidh an ionstraim a cheapann seachvótálaí chun vóta a chaitheamh ag cruinniú na Cuideachta údarás a bhronnadh chun vótáil a éileamh nó chun bheith páirteach i vótáil a éileamh, agus chun críocha Airteagail 37 agus 38, is ionann a bheidh éileamh ag duine a fheidhmíonn mar sheachvótálaí do chomhalta agus éileamh a rinne an comhalta.
41. I dtaobh vótáil a dhéantar ag cruinniú na Cuideachta nó ag cruinniú aon aicme de chomhaltaí na Cuideachta, ní gá do chomhalta, cé acu má bhíonn sé/sí i láthair i bpearsan nó trí sheachvótálaí, atá i dteideal breis agus vóta amháin a chaitheamh, an méid a leanas a dhéanamh má chaitheann sé nó sí vóta:-
- (a) a vótaí go léir a úsáid; nó
 - (b) na vótaí go léir a úsáideann sé nó sí a chaitheamh ar an mbealach céanna.

STIÚRTHÓIRÍ

42. Ní bheidh níos lú ná triúr (3) i gceist le líon na Stiúrthóirí agus mura gcinneann agus go dtí go gcinneann an Chuideachta ag cruinniú ginearálta, ní sháróidh x (x) líon na Stiúrthóirí. Is éard a bheidh sna chéad Stiúrthóirí na daoine a ainmnítear sa ráiteas a sholáthraítear do Chláraitheoir na gCuideachtaí de bhun Alt 22 den Acht.
43. Ní bheidh aon luach saothair iníoctha faoi aon chúinsí le haon duine de na Stiúrthóirí

maidir lena s(h)eirbhísí mar Stiúrthóir, nó ar aon Choiste de na Stiúrthóirí ar féidir na Stiúrthóirí cumhachtaí a tharmligean dóibh faoi Airteagal 64. Féadtar gach costas taistil, óstáin agus costas eile a íoc leis na Stiúrthóirí a thabhaíonn siad go cuí i bhfreastal ar agus i bhfillleadh ó chruinnithe na Stiúrthóirí nó aon choiste de chuid na Stiúrthóirí nó aon chruinnithe ginearálta de chuid na Cuideachta nó a bhaineann le gnó na Cuideachta ar bhealach eile.

44. Bainisteoidh na Stiúrthóirí gnó na Cuideachta, a fhéadfaidh gach costas a thabhaítear chun an Chuideachta a chur chun cinn agus a chlárú a íoc, agus féadfaidh siad gach cumhacht den sórt sin de chuid na Cuideachta nach gceanglaítear san Acht nó sna hAirteagail ar an gCuideachta a fheidhmiú i gcruinniú ginearálta, faoi réir, mar sin féin, fhorálacha an Achta agus na nAirteagal seo agus na n-orduithe siúd, nach bhfuil comhsheasmhach leis na forálacha a thuasluaitear, a fhéadfaidh an Chuideachta i gcruinniú ginearálta (trí rún speisialta) a thabhairt. Ní dhéanfaidh aon ordú den sórt sin a thugann an Chuideachta i gcruinniú ginearálta aon ghníomh de chuid na Stiúrthóirí a rinneadh roimhe seo a neamhbhailiú a bheadh bailí murar tugadh an t-ordú sin.
45. Gan dochar d'Acht 40 den Acht, féadfaidh na Stiúrthóirí aon chinn dá gcumhachtaí a tharmligean don duine nó do na daoine siúd a mheasann siad is cuí, coistí ina measc; cloífidh aon choiste den sórt sin, i bhfeidhmiú na gcumhachtaí a tharmligear amhlaidh, le haon rialacháin a bhféadfadh na Stiúrthóirí a cheangal air.
46. Déanfar gach seic, nóta gealltanais, dréacht, bille malartaithe agus ionstraim inaistrithe eile, agus gach fáltas ar airgead a íoctar leis an gCuideachta a shíniú, a dhréachtú, a ghlacadh, a fhorghníomhú nó a fhorghníomhú ar bhealach eile, de réir mar a bheidh, ag an duine nó na daoine agus ar an mbealach sin a chinneadh na Stiúrthóirí ó thráth go tráth trí rún.
47. Cuirfidh an Chuideachta faoi deara miontuairiscí a iontráil i leabhair a choimeádtar do na cuspoirí a leanas:-
 - (a) ceapadh gach oifigigh a dhéanann na Stiúrthóirí;
 - (b) ainmneacha na Stiúrthóirí a bhíonn i láthair ag gach cruinniú de chuid na Stiúrthóirí agus aon choiste de chuid na Stiúrthóirí;
 - (c) gach rún agus nós imeachta ag gach cruinniú de chuid na Cuideachta agus, de chuid na Stiúrthóirí agus choistí na Stiúrthóirí.

CUMHACHTAÍ ATURNAE

48. Féadfaidh an Chuideachta an chumhacht a bhronnadh ar aon duine, cé acu go ginearálta nó maidir le haon cheisteanna sonraithe, mar a haturnae, chun gníomhais a fhorghníomhú nó chun aon cheist eile a dhéanamh thar a ceann in aon áit cé acu taobh istigh nó amuigh den Stát. Beidh gníomhas a shíníonn an t-aturnae sin thar ceann na Cuideachta ina cheanglas ar an gCuideachta agus beidh an tionchar céanna aige a bheadh aige dá mbeadh sé faoi shéala coitianta.

DÍCHÁILIÚ STIÚRTHÓIRÍ

49. Anuas ar na cúinsí a leagtar amach in alt 148(2) den Acht, déanfar oifig an Stiúrthóra a fhágáil má chuireann Stiúrthóir deireadh le bheith cáilithe do phost iontaobhaí carthanais/comhalta feidhmiúcháin faoi alt 55 den Acht Carthanas, 2009.

ROTHLÚ STIÚRTHÓIRÍ

50. Ag chéad Chruinniú Ginearálta Bliantúil na Cuideachta, éireoidh gach Stiúrthóir as oifig agus ag an gCruinniú Ginearálta Bliantúil an bhliain dá éis sin, déanfaidh an tríú cuid de na Stiúrthóirí i dturas an ama, nó, murab ionann a líon agus tríúr nó iolraí de thrí, éireoidh an líon is giorra don tríú cuid as oifig.
51. Is iad na Stiúrthóirí a éireoidh as i ngach bliain iad siúd b'fhaide a bhí in oifig ó toghadh iad an uair dheireanach, ach i gcás daoine a ndearnadh Stiúrthóirí díobh ar an lá céanna, deimhneofar iad siúd a éireoidh as (mura gcomhaontaíonn siad ar bhealach eile ina measc féin) trí chrannchur.
52. Beidh Stiúrthóir atá ag éirí as incháilithe d'atoghadh.
53. Féadfaidh an Chuideachta, ag cruinniú óna n-éiríonn Stiúrthóir as ar bhealach a thuasluaitear, an oifig fholamh a líonadh trí dhuine a thoghadh san oifig, agus mura ndéanann an Chuideachta amhlaidh, measfar go ndearnadh an Stiúrthóir, má dhéanann sé/sí é/í féin a thairiscint le haghaidh atofa, a atoghadh, mura (a) ag an gcruinniú sin ina mbeartaítear go sainráite gan an oifig fholamh sin a líonadh; nó (b) cuireadh rún le haghaidh atogadh an Stiúrthóra sin faoi bhráid an chruinnithe agus níor éirigh leis.
54. Ní bheidh aon duine, seachas Stiúrthóir a éiríonn as ag an gcruinniú, mura molann na Stiúrthóirí, i dteideal bheith tofa le hoifig Stiúrthóra ag aon chruinniú ginearálta mura, tráth nach lú ná nó nach mó ná fiche a haon lá roimh an dáta a ceapadh don chruinniú, gur fágadh ag oifig chláráithe na Cuideachta (a) fógra i scríbhinn, atá sínithe ag comhalta atá cáilithe go cuí chun freastal ar agus vóta a chaitheamh ag an gcruinniú dá dtugtar an fógra, go bhfuil sé ar intinn aige/aici an duine sin a bheartú le haghaidh tofa, agus (b) fógra i scríbhinn atá sínithe ag an duine atá i gceist go bhfuil sé/sí toilteanach a bheith tofa.
55. Féadfaidh an Chuideachta, ó thráth go tráth, trí ghnáthrún, an líon Stiúrthóirí a mhéadú nó a laghdú, agus féadfaidh sí, chomh maith leis sin, a dheimhniú cén rothlú ina bhfuil an líon méadaithe nó laghdaithe le dul as oifig.
56. Féadfaidh an Chuideachta, trí ghnáthrún ar tugadh fógra sínte ina leith i gcomhréir le halt 146 den Acht, aon Stiúrthóir a bhaint roimh éag a t(h)réimhse oifige, in ainneoin aon ruda eile sna hairteagail seo nó in aon chomhaontú idir an Chuideachta agus an stiúrthóir sin. Ní dhéanfaidh an bhaint sin dochar d'aon éileamh a d'fhéadfadh bheith ag an stiúrthóir sin ar dhamáistí i ngeall ar shárú aon chonartha seirbhíse idir é/í féin

agus an Chuideachta.

57. Féadfaidh an Chuideachta, trí ghnáthrún, duine eile a cheapadh in ionad Stiúrthóra a baineadh ó oifige faoi Airteagal 57. Gan dochar do chumhachtaí na Stiúrthóirí faoi Airteagal 59, féadfaidh an Chuideachta, le linn cruinniú ginearálta, aon duine a cheapadh bheith mar Stiúrthóir, chun folúntas ócáideach a líonadh nó mar Stiúrthóir breise.
58. Féadfaidh na Stiúrthóirí, ag aon tráth, aon duine a cheapadh le bheith mar Stiúrthóir den Chuideachta, cé acu chun folúntas ócáideach a líonadh nó mar Stiúrthóir breise leis na Stiúrthóirí reatha, ach ní sháróidh líon iomlán Stiúrthóirí na Cuideachta, ag aon tráth, an líon, más ann dó, dá bhforáiltear sna hAirteagail seo. Ní shealbhóidh aon Stiúrthóir a cheaptar amhlaidh oifig ach go dtí an chéad chruinniú ginearálta bliantúil eile, agus beidh sé/sí incháilithe le haghaidh atofa ansin.

IMEACHTAÍ STIÚRTHÓIRÍ

59. Féadfaidh na Stiúrthóirí casadh le chéile chun gnó a riar, a gcrúinnithe a chur ar athló agus a rialail ar bhealach eile, faoi mar a mheasann siad is cuí. Déanfar cinneadh ar cheisteanna a thagann chun solais ag aon chruinniú trí thromlach vótaí. I gcás combhionannas vótaí, beidh an cathaoirleach i dteideal an dara vóta nó vóta réitigh a chaitheamh. Féadfaidh Stiúrthóir, agus an Rúnaí, ar fhoréileamh Stiúrthóra, ag aon tráth, cruinniú na Stiúrthóirí a ghairm. Má bheartaíonn na Stiúrthóirí amhlaidh, ní bheidh gá fógra a thabhairt maidir le cruinniú Stiúrthóirí d'aon Stiúrthóir, a bhfuil cónaí air/uirthi sa Stát, ach atá as láthair ón Stát i dturas an ama.
60. Féadfaidh na Stiúrthóirí an líon comhaltaí chun gnó na Stiúrthóirí a dhéanamh a shocrú agus, mura ndéantar é a shocrú amhlaidh, beidh beirt (2) chomhaltaí i gceist.
61. Féadfaidh na Stiúrthóirí leantacha gníomhú in ainneoin aon fholúntais ina líon ach, má laghdaítear agus a fhad a laghdaítear a líon faoi bhun an lín a shocraítear ag an Acht nó de bhun an Achta mar an líon riachtanach Stiúrthóirí, féadfaidh na Stiúrthóirí nó an stiúrthóir leantach gníomhú ar mhaithe leis an líon Stiúrthóirí a mhéadú aníos chuig an líon sin nó ar mhaithe le cruinniú ginearálta na Cuideachta a thionól, ach ar chuspóir ar bith eile.
62. Mura bhfuil an cathaoirleach i láthair ag aon chruinniú laistigh de 15 nóiméad i ndiaidh an ama a cheaptar chun an cruinniú a chur ar bun, féadfaidh na Stiúrthóirí atá i láthair duine dá líon a roghnú chun cathaoirleacht a dhéanamh ar an gcrúinniú.
63. Féadfaidh na Stiúrthóirí aon cheann dá gcumhachtaí a tharmligean do Choistí ina bhfuil comhalta nó comhaltaí siúd na Stiúrthóirí agus na daoine eile siúd a mheasann siad is cuí, agus cloífidh aon choiste a fhoirmítear amhlaidh, i bhfeidhmiú na gcumhachtaí a tharmligítear ar an mbealach sin, le haon rialacháin a leagann na Stiúrthóirí air.
64. Féadfaidh na Stiúrthóirí cathaoirleach aon Choiste a cheapadh; mura gceaptar aon chathaoirleach den sórt sin, nó mura bhfuil an cathaoirleach i láthair ag aon chruinniú de chuid Coiste laistigh de chúig nóiméad déag i ndiaidh an ama a cheaptar chun an cruinniú a chur ar bun, féadfaidh comhaltaí an choiste atá i láthair duine dá líon a

roghnú chun cathaoirleacht a dhéanamh ar an gcruinniú.

65. Féadfaidh coiste casadh lena chéile agus cruinniú a chur ar athló de réir mar a mheasann sé is cuí. Déanfar cinneadh ar cheisteanna a eascraíonn as aon chruinniú coiste trí thiomlath vótaí chomhaltaí an choiste atá i láthair, agus sa chás gurb ann do neamhionannas vóta, beidh an dara vóta nó vóta réitigh ag an gcathaoirleach.
66. Beidh gach gníomh a dhéantar trí aon chruinniú de chuid na Stiúrthóirí nó ag aon duine a ghníomhaíonn mar chomhalta de na Stiúrthóirí nó d'aon Choiste, dá ainneoin gur dealraitheach ina dhiaidh go raibh locht éigin ar cheapadh aon duine den sórt sin a ghníomhaíonn ar an mbealach thuasluaite, nó go raibh sé nó sí nó aon duine de na Stiúrthóirí dícháilithe, chomh bailí céanna amhail a ceapadh gach duine de na daoine siúd go cuí.
67. Beidh rún i scríbhinn, atá sínithe ag na Stiúrthóirí go léir atá i dteideal, i dturas an ama, fógra a fháil maidir le cruinniú na Stiúrthóirí, chomh bailí céanna amhail a ritheadh é ag cruinniú na Stiúrthóirí a tionóladh agus a cuireadh ar bun go cuí. D'fhéadfadh roinnt cáipéisí ina macasamhail d'fhoirm, a bhfuil gach ceann díobh sínithe ag comhalta amháin nó níos mó de na Stiúrthóirí, a bheith i gceist le haon rún i scríbhinn den sórt sin agus beidh éifeacht aige, ar gach cuspóir, ón tráth a shínigh an stiúrthóir deiridh é.
68. D'fhéadfadh comhdháil idir roinnt de na Stiúrthóirí nó na Stiúrthóirí go léir nó, de réir mar a bheidh, comhaltaí an choiste nach bhfuil in aon áit amháin, ach a bhfuil ar chumas gach duine díobh (go díreach nó trí mheán cumarsáide teileafóin, físchumarsáide nó trí chumarsáid leictreonach eile) labhairt le gach duine de na daoine eile agus ar féidir le gach duine de na daoine eile iad a chloisteáil, a bheith i gceist le cruinniú na Stiúrthóirí nó cruinniú coiste a bhunaigh na Stiúrthóir, agus –
 - (a) Measfar go bhfuil Stiúrthóir nó comhalta an choiste a ghlacann páirt ina leithéid de chomhdháil i láthair i bpearsan ag an gcruinniú agus beidh sé/sí i dteideal vóta a chaitheamh agus a bheith curtha san áireamh i líon dá réir; agus
 - (b) measfar go gcuirtear an cruinniú sin ar bun –
 - (i) sa chás go ndéantar an grúpa is mó díobh siúd a ghlacann páirt sa chomhdháil an thionóil;
 - (ii) murab ann don ghrúpa sin, san áit a bhfuil cathaoirleach an chruinnithe ag an tráth sin;
 - (iii) mura mbaineann fómhír (i) nó (ii), sa láthair sin a chinneann an cruinniú féin.

RÚNAÍ

69. Ceapfaidh na Stiúrthóirí an Rúnaí don téarma sin agus ar an luach saothair sin agus ar na coinníollacha sin a mheasann siad is cuí; agus féadfaidh siad aon Rúnaí a cheapann

siad a bhaint.

70. Ní shásófar foráil an Achta nó na nAirteagal seo a cheanglaíonn nó a údaraíonn rud éigin a dhéanamh do Stiúrthóir nó ar Stiúrthóir agus ní bheidh an Rúnaí sása ag a dhéanamh don duine céanna nó ar an gcéanna a ghníomhaíonn mar Stiúrthóir agus mar, nó in ionad, an Rúnaí araon.

SÉALA

71. Ní úsáidfeadh an séala ach faoi údarás na Stiúrthóirí nó choiste na Stiúrthóirí a údaraíonn na Stiúrthóirí ina leith sin, agus déanfar gach ionstraim ar a gcuirtear an séala
- (a) a shíniú ag Stiúrthóir dá chuid nó ag duine éigin eile a ceapadh chun na críche seo ag a Stiúrthóirí nó ag iar-choiste Stiúrthóirí; agus
- (b) a chomhshíniú ag an Rúnaí nó ag an dara Stiúrthóir dá chuid nó ag duine éigin eile a ceapadh chun na críche seo ag a Stiúrthóirí nó ag iar-choiste Stiúrthóirí.

CUNTAIS

72. Cuirfidh na Stiúrthóirí faoi deara go gcoimeádtar taifid leordhóthanacha chuntasaíochta. Measfar gur coimeádadh taifid leordhóthanacha chuntasaíochta má chomhlíonann siad Alt 282(1) go dtí 282(3) den Acht agus má mhínítear iontu idirbhearta na Cuideachta agus má éascaíonn siad ullmhú ráitis airgeadais ina dtugtar léiriú fíor agus cóir ar shócmhainní, dlíteanais, staid airgeadais agus brabús nó caillteanas na Cuideachta.
73. Coimeádfar taifid chuntasaíochta ag an oifig chláraithe nó, faoi réir Alt 283 den Acht, ag an áit eile sin a mheasann na Stiúrthóirí gur cuí, agus beidh siad ar oscailt ag gach tráth réasúnta go ndéanfaidh oifigigh na Cuideachta agus daoine eile atá i dteideal de bhun an Achta, cigireacht orthu.
74. Deimhneoidh na Stiúrthóirí, ó thráth go tráth, cé acu agus a mhéid agus cén tráthanna agus áiteanna agus faoi cén coinníollacha nó rialáil go mbeidh ráitis airgeadais agus taifid chuntasaíochta na Cuideachta nó aon chinn díobh ar oscailt go ndéanfaidh a comhaltaí, nach Stiúrthóirí iad, cigireacht orthu. Ní bheidh aon cheart ag aon chomhalta (nach Stiúrthóir é/í) chun cigireacht a dhéanamh ar aon ráiteas airgeadais nó taifead cuntasaíochta de chuid na Cuideachta seachas faoi mar a bhronntar an ceart sin orthu i reacht, an Bunreacht seo nó má údaraíonn na Stiúrthóirí nó an Chuideachta amhlaidh i gcrúinniú ginearálta.
75. Cuirfidh na Stiúrthóirí faoi deara, i gcomhréir leis an Acht, go ndéanfar ráitis reachtúla airgeadais na Cuideachta, tuarascáil na Stiúrthóirí maidir leis na ráitis siúd agus tuarascáil reachtúil an iniúchóra ar na ráitis airgeadais agus tuarascáil na Stiúrthóirí siúd a ullmhú agus a chur faoi bhráid chruinniú ginearálta bliantúil na Cuideachta, faoi mar a cheanglaítear san Acht go ndéanfar iad a ullmhú agus a chur faoi bhráid chruinniú ginearálta bliantúil na Cuideachta.

76. Cuirfear cóip de ráitis reachtúla airgeadais na Cuideachta, tuarascáil na Stiúrthóirí maidir leis na ráitis siúd agus tuarascáil sin an iniúcháir ar na ráitis airgeadais agus tuarascáil sin na Stiúrthóirí, tráth nach lú ná fiche a haon lá roimh dháta an chruinnithe ghinearálta bhliantúil, faoi bhráid gach duine atá i dteideal faoi Alt 338(1) den Acht iad a fháil.

INIÚCHADH

77. Ceapfar iniúcháirí agus déanfar a ndualgais a rialáil i gcomhréir le Caibidlí 18 agus 19 de Chuid 6 den Acht.

FÓGRAÍ

78. Féadfaidh an Chuideachta fógra a thabhairt d'aon chomhalta cé acu i bpearsan nó trí é a sheoladh sa phost nó trí bhealach leictreonach (faoi mar a shainítear in alt 2(1) den Acht) chuig an gcomhalta ag a s(h)eoladh cláraithe poist nó ríomhphoist (nó, mura bhfuil an seoladh cláraithe amhlaidh, chuig seoladh nó seoladh ríomhphoist an chomhalta is déanaí ar cuireadh an Chuideachta ar an eolas air). Beidh feidhm ag Alt 218(5) den Acht.

Is mian linne, na daoine a bhfuil ár n-ainmneacha agus ár seoltaí suibscríofa, go ndéanfar cuideachta dínn de bhun an bhunreachta seo.

Ainmneacha, Seoltaí agus Cur Síos ar Shuibscríobhaithe
--

Dar dáta an Xú lá de

20

Finné leis na sínithe thuas: -

Seoladh an fhinné

Translator's Note:

Translation of 'Charity Trustee' – Iontaobhaí Carthanais

Translation of 'Executive Member' – Comhalta Feidhmiúcháin